



古今名醫類案

卷五 策

熱氣病	惡寒	麻木	便濁	汗	虛損	癥瘕
	惡熱	寒中	遺精	不汗	勞瘵	積塊

特別  
79  
517  
5



門中武  
第 517  
卷 5



名醫類案卷之五

明新都篁南江瑾集

長子應元校正  
次子應宿述補

癥瘕

齊中尉潘滿如病小腹痛臣意診其脉曰遺積癥也臣意  
即謂齊太僕臣饒內使臣繇曰中尉不復自止於內則  
三十日死後二十餘日渡血死病得之酒且內所以知  
潘滿如病者臣意切其脉深小弱其卒然合合也是脾  
氣也右脉寸口至緊小見瘕氣也以次相乘故三十日  
死三陰俱搏者如法不俱搏者決在急期一搏一代者

類案卷之五

近也故其三陰搏渡血如前止史記

臨苗女子薄吾病甚眾醫皆以為寒熱當死臣意診其脉曰蟻瘕為病腹大上膚黃粗循之戚戚然臣意飲以芫花一撮即出蟻可數升病已三十日如故蟻得之寒濕氣鬱篤不發化為蟲臣意所以知薄吾病者切其脉循其尺其尺索刺粗而毛美奉髮是蟲氣也其色澤者中藏無邪氣及重病史記

隋有患者嘗饑而吞食則下至胃便即吐出醫作噎疾鬲氣翻胃三候治之無驗有老醫任度視之曰非三疾蓋因食蛇肉不消而致但揣心腹上有蛇形也病者曰素有六風常求蛇肉食風稍愈復患此疾矣遂以芒硝木

黃合而治之微泄利則愈通雅知蛇瘕也各醫錄

乾德中江浙間有慎恭道肌瘦如勞唯好食米闕之則口清水出情侶憂思食米頓便如常眾醫莫辨後遇蜀僧道廣以雞屎及白米各半合共炒為末以水一盞調頓服良久病者吐出如米形遂差病源謂米瘕是也

徐文伯善醫術宋明帝宮人患腰痛牽心發則氣絕眾醫以為肉瘕文伯視之曰此髮瘕也以油灌之即吐物如髮稍引之長三尺頭已成蛇能動懸柱上水瀝盡唯餘一髮而已遂愈

唐書曰甄權弟立言善醫時有尼明律年六十餘患心腹膨脹身體羸瘦已經二年立言診其脉曰腹內有蟲當

是誤食髮為之耳因令服雄黃須臾吐一蛇如小手指  
唯有眼燒之猶有髮氣其疾乃愈 太平御覽

異苑曰章安有人元嘉中噉鴨肉乃成瘕病胃滿面赤不  
得飲食醫令服林米須臾煩悶吐一鴨鷄身喙翅背已  
成就唯左脚故綴背所食肉遂差 太平御覽

志怪曰有人得瘕病腹晝夜切痛臨終勅其子曰吾氣絕  
後可剖視之其子不忍違言剖之得一銅酒鎗容數合  
許華佗聞其病而解之使出中櫛中藥以投即消成酒  
焉

景陳弟長子拱年七歲時脇間忽生腫毒隱隱見皮裏一  
物頗肖鼈形微覺動轉其掣痛不堪德興古城村外有

老醫見之使買鮮鰕為羹以食咸疑以為瘡毒所忌之  
味醫竟令食之下腹未久痛即止喜曰此真鼈瘕也吾  
求其所好以嘗試之爾乃製一藥如療脾胃者而碾附  
子末二錢投之數服而消明年病復作但如前補治遂  
絕根本 類編

昔有人共奴俱患鼈瘕奴前死遂破其腹得白鼈仍故活  
有人乘白馬來看鼈白馬遂尿隨落鼈上即縮頭尋以  
馬尿灌之即化為水其主曰吾將差矣即服之如言而  
愈 續搜神記

昔人患瘕瘕死遺言令開腹取之得病塊乾硬如石文理  
有五色人謂異物竊取削成刀柄後因以刀刈三稜柄

消成水乃知此藥可療癰疽也本草

一人患蛇瘕常饑食之即吐乃蛇精及液沾菜上人誤食之腹內成蛇或食蛇亦有此症用赤頭蜈蚣一條炙為末分二服酒下

一人患鼈癭痛有來止或食鼈即痛用鷄屎一升炒黃投酒中浸一宿焙為末原浸酒調下

一人好飲油每飲四五升方快意乃誤吞髮入胃血裹化為蟲也用雄黃五錢水調服

石藏用蜀人良醫也名盛著一士人嘗因承簷溜盥手覺為物觸入指爪中初若絲髮然既數日稍長如線伸縮不能如常始悟其為龍伏藏也乃扣治療之方於石石

曰此方書所不載也當以意去之歸可未蟻蚋塗指庶不深入胃膜其他日免震厄之患士人如其言後因迅雷見火光遍身士人懼急以鍼穴指果見一物自鍼穴躍出不能從

恒宣武有一督將因時行病後虛熱便能飲復茗必一斛二斗乃飽裁減并合便以為大不足後有客造之更進五升乃大吐一物出如升大有口形質縮縮狀似牛肚客乃令置之盆中以斛二斗復茗澆之此物驗之都盡而止覺小脹又增五升便悉混然從口中湧出既吐此物遂瘥或問之此何病答曰此病名斛茗瘥續搜神記齊諧記云江夏安陸縣隆安中有人姓郭名坦得天行病

後遂大善食一日消斗米家貧不能給行乞於市一日  
大饑不可忍人家後門有三畦菜因竊啗之盡兩畦便  
大悶極卧地須臾大吐吐一物如籠因出地漸小主人  
持飯出食之不復食因撮飯著所吐物之上即消成水  
此病尋差 東坡物類相感志

求微中雀爽者每食生魚三斗乃足於後饑作鱸未成忍  
饑不禁遂吐一物如蝦蟆自此不復能食鱸矣 宜室志

有黃門奉使交廣回周顧謂曰此人腹中有蛟龍上驚問  
黃門曰卿有疾否曰臣馳馬大庾嶺時大熱困且渴遂  
飲水覺腹中堅痞如石周遂消石及雄黃煮服之立吐  
一物長數寸大如指麟甲具投之水中俄頃長數尺復

以苦酒沃之如故以器復之明日已生一龍矣上甚為  
之驚訝 明皇雜錄

褚澄治李道念有冷痰五年澄曰汝病是食白淪鷄子過  
多取蘇一升令煮服之吐一物如升涎畏之乃是鷄鷓  
羽翅爪距皆見凡十三頭而病愈 南史

證治要訣云一人病癥瘕腹脹純用三稜莪朮以酒煨服  
下一物如黑魚狀而愈或加入香附子用水煎多服取  
効

一人自幼好酒片時無酒叫呼不絕全不進食日漸羸瘦  
或執其手縛柱上將酒與看而不與飲即吐一物如猪  
肝入酒內其人自此遂惡酒

潘璟字溫叟名醫也虞部員外郎妻孕五歲南陵尉富昌  
齡妻孕二歲團練使劉彛孫妾孕十有四月皆未育溫  
叟視之曰疾也凡醫妄以爲有孕爾於是作劑飲之虞  
部妻墮肉塊百餘有眉目狀昌齡妻夢一童子色漆黑  
倉卒怖悸疾去彛孫妾墮大蛇猶蜿蜒不死三婦皆無  
恙夷堅志

鎮陽有士人嗜酒日嘗數斗至午夜飲興一發則不何過  
一夕大醉嘔出一物如舌視無痕竅至欲飲時眼徧其  
上蠢然而起家人沃之以酒立盡至常日所飲之數而  
止遂投之猛火急爆烈爲十數片士人由是惡酒  
汾州王氏得病右脇有聲如蝦蟆常欲手按之不則有聲

聲相接群醫莫能辨聞留陽山人趙巒善診趙曰此因  
驚氣入於臟腑不治而成疾故常作聲王氏曰因邊水  
行次有大蝦蟆躍高數尺驚作一聲忽驚叫便覺右脇  
牽痛自後作聲尚似蝦蟆也久未差巒乃診王氏脉右  
關脉伏結積病也故正作積病治用六神丹泄下青涎  
類蝦蟆之衣遂差名醫錄

昔有患者飲食如故發則如癩面色青黃小腹脹滿狀如  
姓孕醫診其脉與證皆異而難明主療忽有一山叟曰  
聞開皇六年灞橋有患此病蓋因三月八日遺水食芥  
菜得之有識者曰此蛟龍病也爲龍游於芥菜之上不  
幸食之而病也遂以寒食餠每劑五合服之數劑吐出

一物形雖小而狀似蛟龍且有兩頭獲愈

句容縣佐史能啖鱸至數十斤恒食不飽縣令聞其善啖乃出百斤史快食至盡因覺氣悶又之吐一物狀如麻鞋底令命洗出安鱸所鱸悉成水醫莫能名之令小吏持往揚州賣之冀有識者誠之若有買者但高舉其價看至幾錢有胡求買增價至三百貴文胡輒還之初無酬酢人謂胡曰是句容縣令家物問此是何物胡云是銷魚之精亦能銷腹中塊病人患者以一片如指端繩繫之置病所其塊即銷我本國太子少患此病父求愈病者賞之千金君若見賣當獲大利令竟賣半與之異

記

和州劉錄事者大曆中罷官居和州旁縣食兼數人尤能食鱸嘗言鱸味未嘗果腹邑客乃網魚百餘斤會於野庭觀其下筋劉初食鱸數椽忽似小便因殺出一骨珠子大如豆乃實於茶甌中以櫟覆之食未半怪覆甌櫟傾側舉視之向骨珠子已長數寸如人狀座客共觀之隨視而長頃刻長及人遂梓劉因相毆流血良久各散走一循廳之西一轉廳之左俱及後門相觸翁成一一人乃劉也神已癡矣半日方能語訪其所以皆不省之劉自是惡鱸酉陽雜俎

戴人治王宰妻病曾膈不利用痰藥一湧而出雪白蟲一條長五六寸有口鼻牙齒走於涎中病者忿而斷之中



有白髮一莖按求微中破一物其狀如魚即所謂生瘻也

嘉靖中長洲鄒表妻患小腹下左生一塊形如梅李久之吐出始則腐潰若米糝之狀中則若鯁肉之狀以指撚開則有長髮數條在其內各醫竟不能治遂至不起夫蛇髮等瘻往往載於方書或偶因食物相感假血而成理或有之不可指為妄誕也

山東民間婦人一臂有物隱然膚中屈佶如蛟龍狀婦喜以臂浸盆中一日雷電交作自牖出臂果一龍擘雲而去霏雪錄

**積塊**

羅謙甫治真定王用之年二十九歲病積臍左連脇如覆杯腹脹如鼓多青絡脉喘不能卧時值暑雨加之自利完穀日晡潮熱夜有盜汗以危急求治羅視之脉得浮數按之有力謂病家曰凡治積非有毒之劑攻之則不可今脉虛弱如此豈敢以常法治之遂投分滲益胃之劑數服而清便自調雜以升降陰陽進食和氣而腹大減胃氣稍平間以削之月餘良愈先師嘗曰索古有云養正積自除譬之蒲座皆君子縱有小人自無所容今令真氣實胃氣強積自除矣索古之言豈欺我哉內經云大積大聚衰其大半而止滿實中有積氣太毒之劑

尚不可過况虛中有積者乎此亦治積之一端也邪正虛實宜精審焉

丹溪治一婦性急多勞斷經一月小腹有塊徧左如掌大塊起即痛減腹漸腫脹夜發熱食減其脉冬間得虛微短瀉左尤甚初與白朮一斤和白陳皮半斤作二十貼煎服以三聖膏貼塊上經宿塊軟再宿則塊近下一寸旬日食進痛熱減半又與前藥一料加木通三兩每貼加桃仁九箇而愈

一婦年六十素好酒因暑忽足冷過膝上腕有塊如拳引脇痛不可眠食減不渴已服生料五積散三貼脉沈瀉數小而右甚便赤用大承氣湯大黃減半而熟炒加黃

連芍藥川芎乾葛甘草作湯以括蕪仁半夏黃連貝母為丸吞之至二十貼足冷退塊減半遂止藥半月而愈  
一婦因經水過多每用瀉藥致氣痛曾腹有塊十三枚遇夜痛甚脉瀉而弱此因瀉藥致敗血不行用蜀葵根煎湯再煎參朮青皮陳皮甘草梢牛膝入玄明粉少許研桃仁調熱服二貼連下塊二枚以其病久血耗不敢頓下乃去葵根玄明粉服之塊漸消而愈

一婦形瘦色嫩味厚幼時以火烘濕鞋濕氣上襲致吐清水吞酸服丁香熱藥時作時止至是心疼有痞塊略吐食脉皆微弦重似瀉輕稍和與左金丸二十四粒薑湯下三十餘次食不進朱曰結已開矣且止藥或思飲少

與熱水間與青六丸脉弦漸添困卧着床近四旬與人  
參酒芍藥湯引金瀉木漸思食苦太便秘以生芍藥陳  
皮桃仁人參爲丸與之蜜導便通食進半月而安

一婦因哭子後曾痞有塊如杯食減面淡黃黧黑憊甚脉  
弦細虛瀉日晡發寒熱知其勢危補瀉兼用以補中益  
氣湯隨時令加減與東垣痞氣丸相間服之食前用湯  
食後用丸必湯多於丸也一月寒熱退食稍進仍服前  
藥二月後忽夜大寒熱至天明始退其塊如失至晚手  
足下半節皆腫遂停藥數日忽夜手足腫如失天明塊  
復有而小一暈以二陳湯加白朮桔梗枳實服半月而  
安次年生子

一婦年四十餘面白形瘦性急因忤意乳房下帖肋骨間  
結一塊漸長掩心微痛膈悶食減口苦脉微短瀉知其  
經亦不行思其舉動如常尚有胃氣以琥珀膏貼塊以  
參朮芎歸佐以氣藥二百餘貼并吞潤下丸脉瀉減漸  
充經行紫色用前湯丸加醋炒三稜佐以抑青丸塊消  
一大半食進朱令其止藥待來春木旺區麴次夏塊復  
作大於舊脉平和略弦自言食飽後則塊微痛悶食行  
却自平知其因事激也以前補藥加炒芩佐以木通生  
薑去三稜吞潤下丸外貼琥珀膏半月經行而塊散此  
是肺金爲火所燦木邪勝土土不能運清濁相干舊塊  
輪郭尚在因氣血未盡復濁氣稍留舊塊復起也補其

正氣使肺不受邪木氣平而土氣正濁氣行而塊散矣  
一 婢色紫稍肥性沈多憂年四十經不行三月矣小腹當  
中有一氣塊初如栗漸如盞脉瀆重取却有按之痛甚  
捫之高半寸與千金硝石丸四五次忽乳頭黑且汁恐  
孕也朱曰瀆脉無孕又與三五貼脉稍虛豁知藥竣矣  
令止前藥與四物湯倍加白朮佐以陳皮三十貼俟脉  
完再與硝石丸數次塊消一暈止藥又半月經行痛甚  
下黑血半升內有如椒核者數十粒已消一半累求藥  
不與待其自消至經行三次每下小黑塊乃盡消凡攻  
擊之藥有病即病受之邪輕則胃受傷矣夫胃氣清純  
中和者也惟與五穀肉菜菓相宜藥石皆偏勝之氣雖

參芪性亦偏况攻擊者乎此婦胃氣弱血亦少若待塊  
盡而却藥則胃氣之存者幾希矣

一人作勞飲酒醉卧膈痛饑而過飽遂成左脇痛一塊如  
掌按之甚痛倦怠不食脉細瀆沉弱不數此陰滯於陽  
也以韭汁桃仁七枚服三次塊如失痛在小腹塊如鷄  
卵以童便研桃仁十餘粒又以韭餅置痛處熨之半日  
前後大便通而安

一人茶癖用石膏黃芩升麻爲末砂糖水調服愈

一人愛飲茶用白朮石膏片芩芍藥薄荷膽星爲末砂糖  
調膏津液化下

一人年近三十舊因飽食牛肉豆腐患嘔吐即次飲食不

類聚卷五  
節左脇下生塊漸大如掌痛發則見痛止則伏其人性  
急脉弦數塊上不可按按之愈痛時吐酸苦水或作腎  
氣治朱曰非也非足太陰過食積與濕耳遂投燒荔枝  
核二枚炒山桅五枚去皮炒枳核十五枚去殼山查九  
枚炒茱萸九枚人參一錢細研取急流水一盞煎沸入  
生薑汁令辣食前通酒熱服與六貼吐二貼服四貼與  
此藥且止其痛却與消塊藥用半夏末六錢皂角六箇  
黃連半兩炒石礮二錢另研右以皂角水煮取汁拌半  
夏末晒乾同為末以糖棊膏為丸胡椒大每服百丸薑  
湯下數日愈

一人正月發砂因此有塊左臍邊或舉發起則痛伏則不

痛有時自隱痛自炙臍中脉甚弦右手伏重按則略數  
此蘊熱因春欲汗解而氣弱不能自發為汗復鬱又因  
食不節熱挾食所以成塊宜以保和丸二十溫中丸二  
十抑青丸二十白朮木通三稜湯下之

一婦死血食積痰飲成塊在脇動作雷鳴嘈雜眩暈身熱  
時作時止以台芎山桅炒三稜莪朮並醋煮桃仁去皮  
尖麥皮曲各五錢黃連一兩以吳萸炒半兩以益智炒  
山查香附各一兩羅葡子一兩半炊餅丸服

一婦血塊如盤有孕難服峻藥以香附四兩醋煮桃仁一  
兩去皮尖海石二兩醋煮白朮一兩神曲糊丸

劉仲安治真定總兵董公之孫年二十餘病癖積左脇下

硬如覆手，肚大青筋，發熱肌熱，咳嗽自汗，日晡尤甚，牙  
疳臭惡，宣露出血，四肢困倦，飲食減少，病甚危。劉先以  
沈香二錢，海金沙輕粉各一錢，牽牛末一兩，爲末，研獨  
頭蒜如泥，丸如桐子大，名曰沈香海金沙丸，每服五十  
丸，煎燈草湯送下。穢物兩三行，次日以陳皮羅葡子  
炒各半兩，木香胡椒草豆蔻去皮青皮各三錢，蝎梢去  
毒二錢半爲末，糊丸梧子大，每服米飲下三十丸，名曰  
壅氣丸，服之十日，復以沈香海金沙丸再利之，又令服  
壅氣丸，如此互換服，至月餘，其癖減半，百日良愈。  
御醫盛啓東求樂中東宮妃張氏十月經不通，衆醫以爲  
胎而脹，一日上謂曰：東妃有病，往視之。東宮以上命醫

也，導之，惟謹。既診，出復曰：使長病狀，晚若何，早若何，一  
如見妃聞之，曰：朝廷有此名醫，不早令視我，何也？出而  
疏方，皆破血之劑。東宮視之大怒，曰：好御醫，早晚當誕  
皇孫，乃爲此方，何也？遂不用。數日，病益劇，乃復診之，曰：  
再後三日，臣不敢藥矣。仍疏前方，乃鎖之禁中。家人惶  
怖，或曰：死矣。或曰：將籍沒家矣。既三日，紅棍前呼賞賜  
甚盛，蓋妃服藥下血數斗，疾遂平。既而上亦賜之，曰：非  
謝醫，乃壓驚也。文恪公筆記

田郎中張譚，妻年四十餘，而天癸不至，溫叟察其脉，曰：明  
年血潰乃死，既而果然。  
一兵官食粉多，成積，師以積氣丸，杏仁相半，細研爲丸，五

九熟水下數服愈今厨家索粉與掉粉不得近杏仁近之則爛可徵也

*[Faint bleed-through text from the reverse side of the page]*

虛損

羅謙甫治建康道按察副使奧屯周卿子年二十有三至元戊寅春間病發熱肌肉消瘦四肢困倦嗜卧盜汗大便溏多腸鳴不思飲食舌不知味懶言時來時去約半載餘羅診脉浮數按而無力正應浮脉歌云臟中積冷榮中熱欲得生津要補虛先灸中腕乃胃之紀也使引清氣上行肥湊理又灸氣海乃生發元氣滋榮百脉長養肌肉又灸三里乃胃之合穴亦助胃氣撤上熱使下於陰分以甘寒之劑瀉熱火佐以甘溫養其中氣又食粳米羊肉之類固其胃氣戒以慎言語節飲食懲忿窒慾病氣日減數月氣得平復建二年肥甚倍常或曰世

醫治虛勞病多用苦寒之劑君用甘寒之劑羊肉助發  
熱人皆忌之今食之而効何也羅曰內經云火位之主  
其瀉以甘藏氣法時論云心苦緩急食酸以收之以甘  
瀉之瀉熱補氣非甘寒不可若以苦寒瀉其土使脾土  
愈虛火邪愈甚又云形不足者溫之以氣精不足者補  
之以味勞者溫之損者益之補可去弱人參羊肉之類  
是也先師亦曰人參能補氣虛羊肉能補血虛之病食  
羊肉胡以疑為或者曰索古之學有自來矣

丹溪治一人體長露筋骨體虛而勞頭痛楚自意不療脉  
弦大兼數尋以人參白朮為君川芎陳皮為佐服至五  
日餘未瘳以藥力未至耳自欲加黃芪朱弗許翌日頭

痛頓愈但脉微盛又膈滿不饑而腹脹審知其背加黃  
耆也遂以二陳加厚朴枳殼黃連以瀉其衛三貼乃安  
是瘦人虛勞多氣實也

一老人頭目昏眩而重手足無力吐痰相續脉左散大而  
緩右緩大不及左重按皆無力飲食略減而微渴大便  
四日始一行醫投風藥朱曰若是至春必死此大虛症  
宜大補之以參芪歸芍白朮陳皮濃煎下連栝三十粒  
服一年後而精力如丁年連栝丸薑汁炒薑糊為丸冬  
加乾薑少許

一人肥大蒼厚因厚味致消渴以投寒涼藥愈後以黃雌  
雞滋補食至千數患膈滿嘔吐醫投丁沈附子之劑百



貼而愈值太熱中惡風怕地氣乃堆糠鋪簞蔽風而動止呼吸言語皆不能脉四至浮大而虛此內有濕痰以多飲燥熱藥故成氣散血耗當夏令法當死賴色蒼厚胃氣依在以參朮芪熬膏煎淡五味子湯以竹瀝調服三月諸症悉除令其絕肉味月餘平復因多啖雞卵患胃腹膨脹自用二陳湯加香附子白芷蔻其滿頓除乃令絕肉味勿藥自安

虞恒德治一人年五十餘體略瘦十年前得內傷挾外感證一醫用發表踈利之劑十日餘熱退而虛未復胃中痞滿氣促眩暈召虞治以補中益氣湯間與東垣消痞丸陳皮枳實白朮丸等藥調理而安但病根未盡除而

住藥故眩暈或時舉不甚重至次年因跋涉勞苦又兼色慾之過眩暈大作歷數醫皆與防風荆芥南星半夏蒼朮去風散濕消痰之劑病彌篤一日厥十數次片時復甦凡轉側即厥不知人事舉家惶惑召虞治診其六脉皆浮洪而濡虞曰此氣血大虛之症幸脉不數而身無太熱不死但恐病愈後而有數年不能下榻病者曰苟得寓世卧所甘心投大補氣血藥倍入參黃芪或加附子引經合大劑一日三貼又煎人參膏及作紫河車丸補陰丸之類間服調二月餘服煎藥二百餘貼丸藥三五料用入參五六斤其厥不見飲食如故但未能下榻耳次年聞王布政汝言往京師道經蘭溪以舟載候

就診王公曰此症陰虛風痰上壅因誤多服參芪故病  
久不愈建方以天麻菊花荆芥川芎等清上之藥亦未  
取効止藥後越五六年方起而步履如初不思昔日病  
劇而籍參芪等藥之功遂以王公之語咎真為誤矣

東陽一人發大汗戰慄鼓掉片時許發燥熱身如火焚又  
片時許出大汗如雨身若冰冷就發寒戰如前寒後又  
熱熱後復汗三病繼作晝夜不息產生盧明夫與作瘡  
症治不効召虞診右手陽脈數而浮洪無力陰脈略沈  
小而虛左三部比右差小亦浮濡虞曰此陽氣虛也用  
補中益氣湯倍參芪減升柴一半加尿浸生附子一錢  
半炒黃柏三分乾薑薄桂各五分大棗一枚同煎服一

服病減三之一二服減半四服寒熱止而身尚有微汗  
減去桂附乾薑一半服二貼全愈

薛已治州守王用之先因肚腹膨脹飲食少思服二陳枳  
實之類小便不利大便不實咳嗽腹脹用淡滲破血之  
劑手足俱冷此足三陰虛寒之症也用金匱腎氣丸不  
月而康

一富商飲食起居失宜大便乾結常服潤腸等丸後胃腹  
不利飲食不甘口乾體倦發熱吐痰服二陳黃連之類  
前證益甚小便滴瀝大便泄瀉腹脹少食服五苓瞿麥  
之類小便不通體腫喘嗽用金匱腎氣丸補中益氣湯  
而愈

一男素不善調攝，唾痰口乾，飲食不美，服化痰行氣之劑，胃滿腹脹，痰涎愈甚。服導痰理脾之劑，肚腹膨脹，二便不利。服分氣利水之劑，腹大脇痛，不能睡卧。服破血消導之劑，兩足皆腫，脉浮大，不及於寸。口朝用金匱加減腎氣丸，夕用補中益氣湯煎送。前九月餘，諸症漸退，飲食漸進。再用八味丸補中湯，月餘自能轉側。又兩月而能步履，却服大補湯還少丹，又半載而康後稍失調理，其腹仍脹。服前藥即愈。

一婦患痰熱，治者多以寒涼，偶得小愈。三四年屢進屢退，於是元氣消燦。庚子夏，遍身浮腫，手足麻冷，日夜咳嗽，煩燥引飲，小水不利，大肉盡去。勢將危殆，薛診脉洪大。

無倫按之如無此虛熱，無火法當壯火之源，以生脾土。與金匱腎氣丸料服之，頓覺小水潰決如泉，俾日服前丸及大補湯而愈。三四年間無恙。一日因哀悲動中，前證復作，體如焚燎，口肉盡腐，胃腹脹滿，食不下咽者四日。投以八味二服，神思清爽，服金匱腎氣丸料加參芪歸朮，未竟而曾次漸舒，陟然思食，不三日而病去五六矣。嗣後日用前二丸間服，踰月而起。至秋深復患痢，又服金匱腎氣丸加參芪歸朮黃連吳萸木香痢遂止。但覺後重，又用補中益氣加木香黃連吳萸五味數劑而全愈。

汪石山治一人年踰七十，忽病瞽昧，但其目系漸急，即合

眼昏憒如瞋睡者頭面有所觸皆不避少頃而甦問之曰不知也一日或發二三次醫作風治病轉劇汪診其脉結止甦則脉如常但浮虛耳曰此虛病也蓋病發而脉結者血少氣劣耳甦則氣血流通心志皆得所養故脉又如常也遂以大補湯去桂加麥冬陳皮而安三子俱瘳生時欲應試而懼汪曰三年之內可保無恙越此非子所知果驗

一婦年踰三十形色脆白久病虛弱汪診治十餘年不能盡去其疾一日復診之左則似有似無右則浮濡無力汪曰疇昔左脉不若是今倏反常深爲可懼越三日診之兩手脉皆浮濡惟右則略近於駛而已乃知脉之脉

今異狀者由虛然也近患頭眩眼昏四肢無力兩膝更弱或時氣上衝胃哽於喉中不得動轉則昏憒口噤不省人事內熱口渴鼻塞食減經水漸少汪用參三錢歸身白朮麥門冬各一錢黃芪錢半黃栢七分枳實五分甘草四分服煎服若缺藥日久前病復作服之仍安一人年逾三十質弱而色蒼初覺右耳時或冷氣呵之如箭出越兩月餘左耳氣出如右早則聲啞胃前有塊攢熱早後聲啞稍開攢熱暫息少間攢熱復爾或嗽惡酸水小溲頻赤大溲澹泔雖睡熟亦被嗽而寤噦惡二三聲胃腹作脹頭腦昏痛不堪時或熱發渾身疼痛天明前症少息惟攢熱弗休且近至午後甚覺寒兩腿麻

冷用參二錢半茯苓門冬白朮各一錢黃連甘草枳實  
各五分貝母歸身各一錢白芍八分煎服尋愈  
一人年逾三十神色清減初以傷寒過汗嗣後兩足時冷  
身則惡寒食則易饑日見消瘦頻頻夢遺筋骨疼痛久  
伏枕榻醫用滋陰降火罔效汪視左脉浮虛而緩右則  
浮弦而緩此陽虛兩病者曰易饑善食夢遺似屬陰虛  
若作陽虛而用參芪恐益予病汪曰古人謂脉數而無  
力者陰虛也脉緩而無力者陽虛也今脉浮虛弦緩則  
為陽虛可知以症論之病屬陰虛陰虛則熱發午後屬  
陰則午後當遍身熱發惡熱揭曾露手蒸蒸熱悶煩燥  
矣茲患是症俱無何以認為陰虛夫陽虛則惡寒惡風

雖天暖日融猶畏出門庭今患兩足時冷身多畏寒皆  
陽虛之驗又汗多亡陽非陽虛而何食則易饑者非陰  
虛火動也蓋脾胃以為主氣屬陽脾胃之陽已虛又瀉  
以苦寒屬陰之藥故陽愈虛而內空竭須假谷氣以扶  
助之是以易饑而欲食雖食亦不生肌肉也經曰飲食  
自倍腸胃乃傷又曰飲食不為肌膚其此之謂歟夢遺  
亦非特陰虛經曰陽氣者精則養神柔則養筋今陽既  
虛則陽之精氣不能養神心以藏神神失所養則渾身  
筋骨因以疼痛魂亦不藏故夢寐弗寧安得而不遺乎  
經曰氣固形實陽虛則不能固而精門失守此遺之所  
以頻而不禁也經曰腎者胃之關也今若助陽以使其

固養胃以守其關何慮遺之不止乃以參芪各二錢白  
朮一錢甘草五分枳實香附山查韭子各五分煎服半  
載隨時令寒暄升降而易其佐使療理乃安

仁和縣一吏早衰病脊齒脫不已從貨藥道人得一單方  
獨碾生硫黃為細末實猪臟中水煮臟爛碾細宿蒸餅  
九大如梧桐子隨意服兩月後飲啖倍常步履健年踰  
九十略無老態執後如初因從邑宰入村醉食牛血遂  
洞下數十行所泄若金水嗣是厓悴不日尋卒李巨源  
得其事於臨安人內醫官管範嘗與王樞使言之王謂  
惟聞猪肪脂能制硫黃茲用臟尤為有理類編

江寧南治一婦以惱怒患痰嗽潮熱自汗肌體瘦損屢藥

罔効脉渾渾如泉湧右寸散亂數而且緊以參芪歸木  
茯苓陳皮甘草白芍半夏曲香附圓眼肉四貼自汗十  
愈八九起立覺有力痰嗽減半惟口內乾熱前方半夏  
換貝母出入調理尋愈

江應宿治周三者祁門人也年近三十潮熱咳嗽咽亞診  
之六脉弦數周故以酒豪先年因醉後嘔血是年又復  
嘔血數升遂咳不止百治不應肌食漸減煩燥喘滿予  
與四物換生地加貝母丹皮阿膠麥冬五味煎服加生  
蔗汁一小酒杯薑汁少許嗽漸止食少再加白朮茯苓  
人參食漸進夜噲太平丸晨服六味丸加枸杞人參麥  
冬五味為丸兩月嗽止半年肥白如初

勞瘵

葛洪曰鬼疰者是五尸之一疰又披諸鬼邪為害其病變  
 動乃三十六種至九十九種大略使入寒熱淋瀝沈沈  
 默默不的知所苦無處最惡累年積月漸就沈滯以至  
 又傳傍人乃至滅門覺如是候者急取獺肝一具陰乾  
 杵末服方寸匕日三未可知再作肘後云此方神良宜和  
 間天慶觀一法師行考召極精嚴時一婦人投狀述患  
 人有祟所附須臾召至附語云非我為禍別是一鬼亦  
 因病人命衰為祟耳渠今已成形在患人肺為蟲食其  
 肺系故令吐血聲嘶師掠之此蟲還有畏忌否久而無  
 語再掠之良久云容某說惟畏獺爪屑為末以酒服之

類聚卷五

二十一

則去患家如其言而得愈此予所目見也究其患亦相  
似癩爪者殆癩肝之類歟本事方

一婦染瘵疾最劇偶遇道人過門見而言曰汝有瘵疾不  
洽請何答曰醫藥罔效耳趙曰吾得一法治此甚易當  
以癸亥夜二更六神皆聚之時解去下體衣服於腰上  
兩傍微陷處鍼灸家謂之腰眼直身平立用筆點定然  
後上床合面而卧每灼小艾炷七壯勞蟲或吐出或瀉  
下即時平安斷根不發更不傳染如其言獲全類編

袁州寄居武節郎李應本相州法司掌以吏役事韓似大  
樞密兵火後忽於宜春見之云從岳侯軍得官今閑居  
於此從容問其家事潛然淚下曰某先有男女三人長

子因議買宅入空無人所居之室忽覺心痛背寒凜凜  
遂成勞瘵之疾垂殆傳於次女長子既歿女病尋亟繼  
又傳於第三子同一證候應大恐即禱於城隍神每日  
設麪飯以齋雲水冀遇異人數日因往市中開元寺門  
前有二人衣俗士服自稱貧道踵足而呼曰圍練聞宅  
上苦傳戶貧貧道有一藥方奉傳同入寺中問其姓名  
不答授云云應即取筆書之道人言欲過湖南應留之  
飯辭贈之錢不受臨歧又言此藥以天靈蓋虎糞肉骨  
為主切須仔細尋覓青蛇腦如無亦可服藥前一日須  
盛享城隍神求為陰助應以其事頗異如其言治藥既  
成設五神位具飲饌十品以享城隍又別列酒食以犒



飲陰其仍於其家設使者一位於病榻之前服藥食後  
臟腑大下得蟲七枚色如紅燻肉而腹長約一寸濶七  
八分前銳後方腹下近前有口身之四周有足若魚  
骨細如針尖而曲已死試取火焚之以鐵火筋割刺不  
能入病勢頓減後又服一劑得小蟲四枚自是遂安今  
已十年肌體悅澤不復有疾道入後竟不承其藥用禾  
靈蓋三錢酥炙黃色為末秤居糞內骨一錢入骨為上  
獸骨次之殺虎木腸內取者亦可用同青蛇腦小莖許  
或菴莖許同酥塗炙色轉為度無蛇腦只酥炙亦得鱸  
甲極大者醋炙黃色為末一兩九肋者尤妙安息香半  
兩桃仁一箇去皮尖研以上為末綃篩過攪椰一箇別

藥錄卷五

三十三

為細末射香一錢別研青蒿取近梢者四寸細剉六兩  
歧三百粒葱根二十一箇拍破東引杜李柳桑枝各七  
莖粗如筋頭大各長七寸細剉楓葉二十一片如無亦  
得童便半升先將青蒿桃李柳桑枝楓葉葱歧以官省  
升量水三升煎至半升許去滓入安息香天靈蓋居糞  
內骨煨桃仁與童便同煎取汁去滓有四五合將檳榔  
射香同研均調作一服早晨溫服以被蓋出汗恐汗內  
有細蟲以帛拭之即焚此帛相次須瀉必有蟲下如未  
死以大火焚之並棄長流水內所用藥切勿不得令病人  
知日後亦然十餘日後氣體復元再進一服依前焚棄  
至無蟲而止此藥如病者未亟可以取安如已亟俟其

藥錄卷五

三十三

垂死則令次已傳染者服之先病者雖不可救後來斷  
不傳染韓樞密孫盧帥亞卿傳百一選方

丹溪治一人久嗽吐紅發熱消瘦眾以為瘵百方不應朱  
視之脉弦數日輕夜重用倒倉法而愈次年生子

越州鏡湖邵氏女年十八染瘵疾累年刺灸無不求治醫莫  
莫效漁人趙十煮鰻羹與食食覺內熱病尋愈今醫家  
所用鰻魚煎乃此意

有人得勞疾相因染死者數人取病者於棺中釘之棄於  
水永絕傳染之患流之金山有人異之引岸開視見一  
女子猶活因取置漁舍多得鰻魚食之病愈遂為漁人  
之妻焉精神錄

一人勞傷而得瘵疾漸見瘦瘠用童便一二盞無灰酒一盞  
以新磁餅貯之全猪腰子一對在內密封泥日晚以慢  
火養熟至中夜止五更初更以火溫之發瓶飲酒食腰  
子一月而愈後以此治數人皆驗此蓋以血養血全勝  
金石草木之藥也瑣碎錄

一女子十餘歲因發熱咳嗽喘急小便少後來成腫疾用  
利水藥得愈然虛羸之甚遂用黃芪建中湯日一服一  
月餘遂愈蓋人稟受不同虛勞小便白濁陰臟人服橘  
皮煎黃芪建中湯獲愈者甚眾至於陽臟人不用暖藥  
雖建中湯不甚熱然有肉桂服之稍多亦反為害要之  
用藥當量其所稟審其冷熱而不可一槩用也醫餘

睡州楊寺丞有女事鄭迪功女有肉蒸內熱之病時發外  
寒寒過內熱附骨蒸盛之時四肢微瘦足跌墮者其病  
在臟腑中衆醫不差適劇州吳醫只單石膏散服後體  
微涼如故其方出外臺秘要只用石膏研細十分似麪  
以新汲水和服方寸匕取身不熱爲度各醫錄  
無錫游氏子少年耽於酒色旋得疾久而弗愈勢危甚忽  
語其家人曰常見兩女子服飾華麗其長才三四寸每  
緣吾足而行并在腰而沒家人以爲祟丁日各醫自  
遠而至家人扣之醫曰此腎神也腎氣絕則神不守舍  
故病者見之癸志  
一人患瘵瘵二年一日無肉味腹痛不可忍其家恐傳染

置於空室待自終三日無肉食或惠鷄子病人自煎食  
將熟忽打噴嚏有紅線二尺許自鼻入銚遂以碗覆煎  
死之自此遂安

汪石山治一人年逾三十形瘦色脆過於勞病怠惰嗜  
卧食後腹痛多痰覺自胃中而上又吐酸水肺氣不清  
聲音不亮已數更醫或用補陰消導等劑汪診之脉皆  
細濡無力約有七至問曰熱乎曰不覺曰嗽乎夜間數  
聲而已曰大便何如近來帶澹糞門傍生一瘡今已潰  
膿未收口耳曰最苦者何夜卧不安四肢無力而已汪  
曰脉病不應夫脉數主熱今覺不熱乃內蒸骨髓歟或  
正氣已極無復能作熱歟據證似難起矣何以故虛勞

蓋門生竈必成癯瘠脈不數者尚不可爲况脈數乎蓋肺爲吸門司上太腸爲肛門司下肺與大腸府藏相通况肺爲氣主氣陽當升虛則下陷所謂物極則反也今病內熱燔灼肺氣久傷故下陷肛門而生癯瘠肺傷極矣非藥能濟月餘尋卒

江少微治邑人方信川子年三十餘因勞後失飢得潮熱疾六脈弦數宛然類瘵疾但日出氣暄則熱天色陰雨夜涼則否暄盛則增劇稍晦則熱減已踰二年江曰此內傷脾胃陰熾而陽鬱耳以補中益氣湯加丹皮地骨嗽喘更加阿膠麥冬五味子而愈

宿按勞瘵乃精竭血虛火盛無水之症脈多弦數潮

熱咳嗽咯血若肉脫脈細數者不洽經云心本熱虛則寒腎本寒虛則熱又云心虛則熱腎虛則寒當分別陰陽虛實心腎虛而寒者是氣血正虛以其真賦中和之人暴傷以致耗散真氣故必近於寒宜溫補以復元氣心腎虛而熱者是氣血之偏虛也以其天稟性熱血少之人貪酒好色腎水不升心火不降火與元氣不兩立一勝則一負故致於熱也苟非滋陰養血涼肝補腎則陽愈亢而成勞極偏虛之症矣或有挾外感邪熱致燥陰血枯涸者故不可用參芪甘溫之藥若產後血虛及勞心用力失血飲食失調暴傷血虛之症非血虛本病亦正虛之類也又兼溫補

其氣陽虛者挾寒之症陰虛者挾熱之候內傷者暴損元氣重損者累傷氣血積損成勞病已極矣雖良工鮮能善其後矣

汗

東垣治一人二月天氣陰雨寒濕又因飲食失節勞後所傷病解之後汗出不止沾濡數日惡寒重添厚衣心胃間時煩熱頭目昏憤上壅食少減此乃胃中陰火熾盛與外天雨之濕氣峻然二氣相合濕氣大作汗出不休兼見風邪以助東方甲乙風藥以去其濕甘寒瀉其熱羌活勝濕湯以炙甘草生芍酒芍人參羌活防風藁本獨活細辛蔓荊子川芎各三分黃芪生甘草升麻柴胡各半錢薄荷一分作一服水煎一人別處無汗獨心孔一片有汗思慮多則汗亦多病在用心名曰心汗宜養心血以艾煎湯調茯苓末服之

劉全備治一男子驚恐自汗魯服麻黃根黃芪牡蠣等藥不效用白芷一兩辰砂半兩為細末每服二錢酒調下因其不能飲用茯苓麥冬調下而愈蓋此藥能斂心液故也

虞恒德治一人得內傷虛症發熱自汗如雨不止服補中益氣湯十數貼不效虞以前方加減每貼用蜜制黃芪一錢半人參一錢白朮甘草陳皮各七分當歸白芍各一錢升麻柴胡各一分加桂枝三分麻黃根七分浮小麥一撮炮附子三分三貼而汗止熱亦退尋安

嚴州山寺有且過僧形體羸瘦飲食甚少夜卧遍身出汗迨且衾衣皆濕透如此二十年無復可療惟待斃耳監

寺僧曰吾有藥絕驗為汝治之三日宿疾頓愈遂併以方授之乃桑葉一味乘露採摘控焙乾為末二錢空腹溫米飲調或值桑落乾者但力不及新耳按本草亦載桑葉止汗可證

一人血氣衰弱羸瘦木汗如雨不止諸醫弗效以十全大補湯倍加參芪以童便製過附子一劑即効數劑全愈

醫鑑

不汗

晉書曰張苗雅好醫術善消息診處陳廩立得病連服藥發汗汗不出衆醫云發汗不出者死自思可蒸之如中風發溫氣於外迎之必得汗也復以問苗云會有人疲極汗出卧簟中冷得病苦增寒諸醫與散四日發其汗者八次汗不出乃燒地布桃葉於上蒸之即得大汗便如被下傳粉粉身極燥乃起即愈廩立如其言果差

便濁

附便數

丹溪治一婦人氣血兩虛有痰痛風時作陰火間起小便白濁或赤帶下用青黛蛤粉樗皮滑石乾薑炒黃柏炒為末神曲糊丸仍用燥藥

一人便濁半年或時夢遺形瘦作心虛治以珍珠粉丸合定志丸服

一婦年近六十形肥味厚中焦不清積為濁氣流入膀胱下注白濁濁氣即是濕痰用二陳湯加升麻柴胡蒼朮白朮四貼濁減半覺胃滿因升麻柴胡升動胃氣痰阻滿悶用二陳加炒曲白朮以泄其滿素無痰者升動不悶兼以青黛樗皮蛤粉黃柏炒乾薑滑石炒為末炒神曲

糊丸服之

一人便濁而精不禁用倒倉法有效

一婦人上有頭風鼻涕不有白帶用南星蒼朮酒芩辛夷

川芎炒栢滑石半夏牡蠣粉

東垣治一婦人帶漏久矣諸藥不效診得心脆尺脈微其  
白帶下流不止崩中者始病血崩久則血少復亡其陽  
故白濁之物下流不止如本經血海將枯津液復亡枯  
乾不能滋養筋骨以本部行經益津液以辛熱之氣味  
補其陽道主其血脈以苦寒之藥泄其肺而救上熱傷  
氣以人參白葵花四分橘皮五分生黃芩細研郁李仁  
去皮尖研炙甘草柴胡各一錢乾薑細末二錢除黃芩

外水煎將熟入芩熱服愈

呂滄洲治一婦年盛嗜酒且善食忽疾作肌肉頓消骨立  
診其脈則二手三部皆洪數而左口尤躁疾曰此三陽  
病由一水不能勝五火乃移熱於小腸不瘥則淋其人  
曰前溲如脂者已數日語未竟趨入卧內澁及需其溺  
器以規則如飴釜置烈火湧沸不少休呂以虎杖滑石  
石膏黃柏之劑清之痛稍却而湧沸猶爾也繼以龍腦  
神砂末蘼之以裨柿食方寸匕沸輒止

南安太守松江張汝弼曾患渴疾白濁又服補腎藥皆不  
效一日遇一道人俾服酒蒸黃連丸其疾頓瘳其製法  
以宣黃連一斤去鬚葉酒浸一宿置甑上累蒸至黑取



出晒乾爲細末蜜丸桐子大日午臨卧酒吞二十九臟  
毒下血者亦治

汪石山治一人年踰三十季夏日午房後多汗晚浴又近  
女色因患白濁醫用胃苓湯加右眼作痛用四物湯入  
三黃服之睡醒口愈加苦又加左膝腫痛伸冬不藥濁  
止漸次延至背痛不能轉側日輕夜重噫則如繩束撮  
腰脇痛楚不堪呼氣亦應背痛或時夢遺次年正月汪  
診之脉皆緩弱無力脾虛可知左脉滑者血熱也遂以  
人參黃芪各二錢茯苓白朮歸身麥冬各一錢牛膝神  
曲陳皮黃柏各七分甘草五味各五分煎服三十餘劑  
仍以龜板參芪黃柏各二兩熟地山茱萸枸杞杜仲歸

茯苓牛膝各一兩九服尋愈

一男小便日數十次如椰米泔色亦曰神思恍惚瘦悴食

減以女勞得之服桑螵蛸散末終劑尋愈安神魂定心

志治健忘小便數補心氣其方螵蛸遠志菖蒲龍骨人

參茯神當歸龜甲醋炙以上各一兩爲末每服二錢夜卧

人參湯調本草

一人脬氣不足小便頻數日夜百餘次用益智仁天台烏

藥大如臂者等分俱爲末藥酒煮山藥打糊爲丸如梧

桐子大各之曰縮泉丸卧時用鹽酒下五七十九

薛已治大司徒許函谷在銀臺時因勞發熱小便自遺或

時不利薛作肝火陰挺不能約制午前用補中益氣加

山藥黃柏知母午後服地黃九月餘諸症悉退設服燥劑而頻數不利用四物麥冬五味甘草若數而黃用四物加山茱萸黃柏知母五味麥冬若肺虛而短少用補中益氣加山藥麥冬若陰痿痺而頻數用地黃丸若熱結膀胱陰虛陽無以生而淋瀝用滋腎丸若膀胱陽虛陰無以化而淋瀝用六味丸若轉筋小便不通或喘急欲死不問男女孕婦急用八味丸緩則不效若老人陰痿思色精不出而內敗小便道澀痛如淋用加減八味丸料加車前牛膝若老精已竭而復耗之大小便道牽痛愈痛愈欲便愈便則愈痛亦治以前藥不應急加附子若喘嗽吐痰腿足冷腫腰骨大痛面目浮腫太陽

作痛亦治以前藥若痛愈而小便仍澀宜用加減八味丸以緩治之可也

司徒邊華泉小便頻數澀滯短赤口乾吐痰此腎經陽虛熱燥陰無以化用六味滋腎二丸而愈

司馬李梧山莖中作痛小便如淋口乾吐痰此思色精降而內敗用補中益氣六味地黃尋愈

考功楊朴庵口舌乾燥小便頻數此膀胱陽燥陰虛先用滋腎丸以補陰而小便之頻數愈遂用補中益氣六味地黃以補肺腎而若汗多而小便短少或體不禁寒乃脾肺氣虛也

周主客素膏染小便赤數口乾作渴吐痰稠粘右寸關數

而有力此脾肺積熱遺於膀胱用黃芩清肺飲調理脾肺用滋腎丸六味丸以滋腎水尋愈

一儒者發熱飲水不絕每如廁小便瀕痛大便牽痛此精竭復耗所致用六味丸加五味及補中益氣且其自守謹篤尋愈若肢體畏寒喜熱飲食用八味丸

縣令顧榮甫尾閭痒而小便赤瀕左尺脉洪數屬腎經虛

熱法在滋補渠不然其言乃服黃柏知母等藥年許高

骨腫痛小便淋漓肺腎二脉洪數無倫薛曰子母俱敗

鮮克濟矣果尋卒

一男子左尺瀕結右寸洪數薛曰此誠可懼蓋肺金不能

生腎水故爾果至季冬並道瀕痛如淋愈痛愈欲便愈

便則愈痛而歿

遺精

丹溪治一人虛損盜汗遺精白濁用四物加參朮黃芪知母黃柏牡蠣牛膝杜仲五味煎服尋愈

一人虛損小便中常出精血以四物加山梔參朮麥冬黃柏木通車前子茯苓

一人年六十五精滑常流以黃柏知母蛤粉山藥牡蠣飯丸梧桐子大鹽湯下八十九

一人潮熱精滑八物加黃柏知母牡蠣蛤粉

東垣治一人年三十餘病脚膝痿弱臍下尻醫皆冷陰汗臊臭精清不固群醫治以甘熱之藥罔效李暉之沈數有力曰此因醇酒高粱滋火於內逼陰於外復投熱藥

反瀉其陰而補其陽真所謂實實虛虛也以滋腎丸黃

柏知母酒洗各一兩肉桂五分丸梧桐子大湯下百丸太苦寒之劑製之以急寒因熱用引入下焦適其病所以瀉命門相火再服而愈

虞恒德治一人病遺精潮熱卧榻三月矣虞膝之左右寸

關皆浮虛無力兩尺洪大而軟投補中益氣加熟地知母黃柏地骨皮煎下珍珠粉丸外做小篋籠一箇以籠陰莖勿使搭肉服藥三十餘貼尋愈

丹溪治一人年二十餘夜讀至四五鼓猶未就枕故卧莖

一有所著精隨而遺不著則否飲食減而倦怠少氣夫何故蓋用心過甚二火俱起夜弗就枕血不歸肝則腎

水有虧，火乘陰，乘入客下焦，鼓其精房，則精不得聚藏而走失矣。因玉莖著物，猶厥氣客之，故作接內之夢。於是上則補心安神，中則調理脾胃，提掣其陰，下則益津生陰，固陽不三月而疾如失。

一老人年六十歲，患癯而嗽多，服四獸飲積成濕熱，乘於下焦，已歲矣，殆矣。朱診之，尺數而有力，與補中益氣加涼劑三日，與黃柏丸及早尺數頓減。詢其有夜夢否，曰有之，幸不泄，爾是蓋老年精衰，固無以泄為太熱，結於精房，得泄火益陰之藥，其火散走於陰器之竅，疾可瘳矣。再服二日，又夢其瘳嗽全愈。

一人每夜有夢，朱連診二日，觀其動止，頭不仰舉，但俯視，

不正必陰邪相著，叩之不言，其狀詢其僕，乃言至廟見侍女以手撫摩，久之不三日而寢疾全汰，師入廟毀其像，小腹中泥土皆濕，其疾隨瘳。此則鬼魅相感耳。

一男子至夜脊心熱而夢遺，用珍珠粉丸、猪苓丸遺止，終服紫雪春熱畢除。

一男子脉洪腰熱遺精，用沈香和中丸下之，導赤散瀉其火而愈，仍知身熱而遺者，熱遺也。

按沈香和中丸，即王仲陽之滾痰丸。

丹溪壯年有夢遺症，每四十五日必一遺，累用鳳髓丹、河間秘真丸，効雖少見而遺終不除。改用遠志、菖蒲、韭子、桑螵蛸、益智、酸棗仁、牡蠣、龍骨、鎖陽等為丸服之，尋愈。

一男子丁年夢遺群醫以珍珠粉丸罔效亦以遠志菖蒲等劑投之應手而愈

一壯男子夢遺白濁少腹有氣冲上每日腰熱如作西涼每腰熱作則手足冷前陰無氣來耕腰熱退則前陰氣耕手足温又且多下氣暮多噫特振隔一旬二旬必遺脉且弦搏而大午洪大知其有鬱滯也先用沈香和中丸大下之次用加減八物湯下滋腎丸百粒若稍與蛤粉等瀉藥則遺與濁滋甚或一夜二遺遂改用導赤散大劑並湯服之遺濁皆止

有二中年男子皆夢遺醫或與瀉藥反甚連遺數夜乃先與神芎丸大下之繼製猪苓丸服之皆得痊

一武官便濁精滑不禁百藥罔效用倒倉法而愈於此見夢遺屬鬱滯者多矣

吳球治一男子因病後用心過度遂成夢遺之患多痰瘦削群醫以清心蓮子飲久服無效吳診脉緊濡知冷藥利水之劑太過致使腎冷精遺而腎氣獨降故病益劇乃以升提之法升坎水之劑離火降陽氣而養血滋陰次用鹿角膠人乳填補精血不踰月而愈

水瀆吳姓者病精滑百藥勿療或授以一術但以脇腹縮尾間閉光暝目頭若石壓之狀即引氣自背後直入泥丸而後嚥歸丹田不計遍數行住坐卧皆爲之仍服保真丸及半載顏色悅澤病不復作矣此術亦可以療頭

風出席上  
補談

盛啓東永樂戊子夏治郁文質遺精形體羸弱兼痰嗽交  
作日夕不能休群醫治之轉劇盛視之曰此陽脫也急  
治則生緩則死非大料重劑則不能療於是附子天  
雄佐以參苓白朮日加數服夜則減半自秋徂冬所服  
附子約百餘枚厥疾乃瘥

有人夢遺精初有所見後來雖夢無所感日夜常常走漏  
作心氣不足服補心藥罔效作腎氣虛治亦罔效醫問  
患者覺腦冷否應之曰只爲腦冷服驅寒散遂安蓋腦  
者諸陽之會髓之海腦冷則髓不固是以遺漏也宜先  
去腦中風冷腦氣沖和兼服益心腎藥無不瘳者醫餘

王中陽治一石工丁年忽病頭目不利肩背拘急合目卽  
便泄精四肢沈困不欲執作夢寐不寧每作虛治罔效  
王治之使其翹足而坐則其股足隨氣跳躍如脉六動  
其脉亦過位長實有力遂用涼膈散清木香丸互換疎  
導三五次更服三黃丸數日尋愈

汪石山治一人年四十餘洩精久之神不守舍夢亂心跳  
用清心蓮子飲罔效取袖珍方治小便出髓條藥服之  
又服小兒系子丸又服四物加黃柏亦罔效汪診之一  
日間其脉或浮濡而駛或沈弱而緩曰脉之不常虛之  
故也其症初因腎水有虧以致心火亢極乘金木寡於  
畏而侮其脾此心脾腎三經之病也理宜補脾爲主兼

之滋腎養心，病可療也。方用人參爲君，白朮茯苓麥冬  
酸棗仁山梔子生甘草爲佐，蓮肉山查黃柏陳皮爲使。  
其他牡蠣龍骨川芎白芍熟地之類，隨其變症而出入。  
之且曰：必待人參加至五錢，病脫其人未信服，二十餘  
日人參每服三錢，洩精減半矣。又月餘人參加至五錢，  
尋愈。

江篁南治一壯年，患遺精，醫用滋陰降火劑罔效。一醫用  
牡蠣龍骨等止瀉藥，其精愈洩。又服芩連藥，山梔等藥  
百五十餘貼，兼服小便二百餘碗。又或作痰火治，或作  
濕熱治，俱罔效。蓋經年餘矣。二月間請江診視，左脈浮  
濡無力，右寸浮散，近駛兩尺，尤弱不在。尋按其人頭暈

筋骨痠疼，腰痛畏風，小便黃，腹中時鳴，以熟地黃遠志  
爲君，當歸身桑螵蛸人參爲臣，石蓮子肉白茯苓爲佐，  
石菖蒲甘草爲使。十餘貼後，精固，惟筋骨猶痠，小便猶  
黃，腹或至晚猶鳴。煎劑再加黃柏，兼服補陰丸，加人參  
鹿茸，兔系子，桑螵蛸，茯苓之類，兩月而愈。

夫夢遺有三：有因用心積熱而泄者，有因多服閉冬茯  
神車前知母黃柏冷利之劑而流泄者，有久遺玉閉，  
不閉腎氣獨降而泄者。治法積熱者清心降火，冷利  
者溫補下元，腎氣獨降者升提腎水，使水火自交而  
坎離之位定矣。

山陰戴文訓少年患夢遺，服固精丸而愈。用狗頭骨一個



煨存性用細米飯爲丸如梧桐子大硃砂金箔爲衣每服五六十九

麻木

東垣治一婦麻木六脉中俱得弦洪緩相合按之無弦在上是風熱下陷入陰中陽道不行其證閉目則渾身麻木晝減夜甚開目則漸退久則止懼而不睡身體重咳嗽煩燥氣促餘無所苦色脉相應經曰陽病瞑目而動輕陰病閉目而靜重又云諸脉皆屬於目又云開目陽道行陽氣遍布週身閉目則陽道閉不行如晝之分知陽衰而陰旺也且麻木爲風皆以爲然細校之則有區別耳久坐亦有麻木喻如繩縛之人釋之覺麻作良久自已以此驗之非風邪乃氣不行也治當補肺氣則已如經絡中陰火乘其陽分火動於中而麻木當兼去其

陰火則愈矣痰嗽者秋涼在外在上而作也宜以溫劑實其皮毛身重脉緩者濕氣伏匿而作也時見躁作當升陽助氣益血而瀉陰火與溫中通行經脉補其陰陽則已矣遂以補氣升陽和中湯服之愈

一老人身體熱麻手足股膝無力飲食有汗善笑善饑痰涎不利舌強難言聲啞脉左寸洪大有力此邪客於經絡之中二臂外有數癢問其故對以燃香所致李曰病皆由此也蓋手三陽從手表上行於頭加以火邪陽併於陽勢盡熾焉故邪熱妄行流散於周身而為熱麻經曰胃熱則蟲動蟲動則廉泉開故涎下熱傷元氣而為沈重無飲食入胃慄悍之氣不循常度心火盛則善笑

脾熱則消穀善飢肺經衰則聲啞仲景云微數之脉慎不可灸老人奉養以膏粱之味無故而加以火熯之毒熱傷經絡而致治以清神補氣不旬日而愈以黃柏知母為君寒苦瀉火邪壯筋骨乃腎欲堅急食苦以堅之黃芪生乾薑瀉熱實表五味止汗補肺不足為臣炙甘草當歸和血潤燥升麻柴胡行少陽陽明經自地升天為佐右剉水煎取清汁服

一 人五月間兩手指麻木怠惰嗜卧此熱傷元氣也以補中益氣湯減白朮陳皮川歸加白芍五味遂安

一 人四肢麻木乃氣虛也四君子加天麻麥冬黃芪川歸木劑服之愈

一人年四十餘面目十指俱麻木乃氣虛也以補中益氣  
加木香附子麥冬羌活防風烏藥服之愈  
羅謙甫治中書左丞張仲謙年三十餘正月在大都患風  
證半身麻木一醫欲汗之羅曰治風當通因通用法當  
汗但此地此時雖當交春寒氣猶存汗之則虛其表必  
有惡風寒之證張欲速差遂汗之覺體輕快而喜數日  
復作謂羅曰果如君言官事煩劇不敢出門如之何羅  
曰仲景云大法夏宜汗陽氣在外故也今時陽氣尚弱  
初出於地汗之則使氣亟奪衛氣失守不能肥實湊理  
表上無陽見風必大惡矣內經曰陽氣者衛外而為固  
也又云陽氣者若天與日失其所則折壽而不彰當汗

之時猶有過汗之戒況不當汗而汗者乎遂以黃芪建  
中湯加白朮服之滋養脾胃生發榮衛之氣又以溫粉  
撲其皮膚待春氣盛表氣漸實即愈矣內經曰化不可  
伐時不可違此之謂也

吳夢山治一婦夏月取風涼夜多失蓋因得冷風入骨兩  
足麻木疼痛不已服祛風止痛藥不効與大防風湯數  
服其疾漸瘳仍以烏頭粥服三晨而愈

薛已治大尹劉孟春素有痰兩臂作麻兩目流涕服祛風  
化痰藥痰愈甚臂反痛不能伸手指俱攣薛曰麻屬氣  
虛因前藥而復傷肝火盛而筋攣耳况風自火出當補  
脾肺滋腎水則風自息熱自退痰自清遂用六味地黃

九補中益氣湯不三月而痊

汪石山治一婦或時遍身麻痺則懵不省人事良久乃甦醫作風治用烏藥順氣散又用小續命湯病益甚汪診之脈皆浮濡緩弱曰此氣虛也麻者氣緩行遲不能接續也如人久坐膝屈氣道不利故伸足起立而麻者是也心之所養者血所藏者神氣運不到血亦空求由心失所養而昏懵也用參芪各二錢歸身茯苓門冬各一錢黃芩陳皮各七分甘草五分煎服而愈

江應宿治一人年踰六十患十指麻木不仁二年矣醫作痰治風治罔效一日因憂思鬱怒臥床月餘目不交睫飲食減少腹中如束縛不安宿診之六脈沈細無力此

木虛證也投八味丸令空心服日則服歸脾湯倍加參芪二三服而諸症漸減睡卧安寧月餘服過煎藥三十餘貼丸藥六七兩而愈十指亦不復麻木矣但行走乏力如在砂中予曰病雖愈而元氣尚未復當服參苓白朮散與前丸惑於人言用理中丸一日因大怒病復作一醫投附子理中湯煩燥身熱如火不旬日而歿或曰此病先因附子而愈後因附子而亡何也予曰余乃壯火之源以生脾土故効彼用之不當孤陽飛越而亡

羅謙甫治真定府武德鄉年四十六歲因憂思勞役飲食  
 失宜病四肢體冷口鼻氣亦冷額上冷汗出時發昏憤  
 六脈如蛛絲一作風證欲以宣風散下羅因思錢氏小  
 兒論制宣風散謂小兒內傷脾胃或吐或瀉久則風邪  
 陷入胃中而作殮泄散中有結忍傳慢驚以宣風散去  
 風邪內經云久風為殮泄正此謂也今形證乃陰盛陽  
 虛苦寒之劑非所宜也內經云陰氣有餘則多汗身寒  
 又云陰盛身寒汗出身常清數慄而寒寒而厥又云陰  
 盛生內寒歧伯曰厥氣上逆寒氣即於胃中而不瀉不  
 瀉則溫氣去寒獨留故寒中東垣解云此脾胃不足勞

後形體中焦營氣受病未傳寒中惟宜補陽遂以理中  
 湯加黑附子每服五錢多用葱白煎羊肉湯取清汁一  
 大盞調服之至夕四肢漸溫汗出少夜深再服翌日精  
 神出六脈生數服而愈

郝允診太常博士楊日宣病寒允曰診君之脈首震而尾  
 息尾震而首息在法為魚游蝦戲不可治不數日死  
 徽廟常苦脾疾國醫藥罔效召楊介診視訖進藥上問何  
 藥介對曰大理中丸上曰朕服之屢矣不驗介曰臣所  
 進湯藥佐使不同陛下之疾以食冰太過得之今臣以  
 水煎此藥欲已受病之源果二服而愈

要案

丹溪治一壯年惡寒多服附子病甚脈弦而似緩以江茶入薑汁香油些少吐痰一升減綿衣大半又與防風通聖散去麻黃大黃芒硝加地黃當歸百貼而安知其燥熱已多血傷亦深須淡食以養胃內觀以養神則水可升火可降必多服補血涼血藥乃可否則內外不靜腎水不生附毒必發彼以為迂果疽發背死

一老婦形肥肌厚夏惡寒戰慄喜啖熱御綿多汗已得附子三十餘渾身痒甚脈沈瀦重取稍大知其熱甚而血虛也以四物湯去芍倍地黃加白朮黃芪炒黃柏生甘草人參每貼二兩重方與一貼腹大泄目無視口無言

知其病熱深而藥無反佐之過也以前藥熱炒蓋借火力為白導與一貼利止四貼精神回十貼全愈

一女子惡寒用苦參一錢赤小豆一錢韭水探吐後用川芎蒼朮南星黃芩酒糊丸服

一人形瘦色黑素多酒不困年半百有別館一日大惡寒發戰自言渴却不飲脈大而弱右關稍實略數重取則瀦此酒熱內鬱不得外泄由表熱而不虛也黃芪三兩乾葛一兩煎飲之大汗而愈

一婦人年五十餘形瘦面黑喜熱惡寒六月兩手脈沈而瀦重取似數三黃丸下以薑汁每三十粒三十次微汗而安

一人年十七家貧多勞十一月病惡寒而吐血兩三日六  
脈緊瀋一月後食減中痞醫投溫膽湯枳殼湯三日後  
發熱口乾不渴有痰曰此感寒也詢之八日前曾於霜  
中渡水三四次心下有悲泣事腹亦饑遂以小建中湯  
去芍藥加桔梗陳皮半夏四劑而愈

一人嗜酒因暴風寒衣薄遂覺倦怠不思食者半月且發  
狂身如被杖微惡寒診其脈皆浮大按之豁々然左爲  
甚朱作極虛受風寒治之以人參爲君黃芪當歸白朮  
爲臣蒼朮甘草陳皮通草葛根爲佐使大劑與之一日  
後遍身汗出如雨凡三易被得睡覺來諸症悉除  
祝仲暉治一貴婦病惡寒日夜以重裘覆其首起躍入沸

湯中不覺醫以爲寒甚祝持之曰此痰火上騰所謂陽  
極似陰者非下之火不殺下經宿而撤裏呼水飲之旬  
日氣平乃愈

滑伯仁治一人七月病發熱或令服小柴胡湯林發太過  
多汗亡陽惡寒甚筋惕肉瞤視其脈微欲絕以真武湯  
七八服稍愈服附子八枚而痊

吳芟山治一婦患筋骨肢節疼痛及身背頭痛兩尺脈弦  
憎寒如瘧每以散風止痛罔效後以四物入羌活防風  
秦艽官桂數服而愈

直閣將軍房伯玉患冷疾夏日常複衣張嗣伯爲診之曰  
卿伏熱應須以水發之非冬月不可至十一月寒甚令

二人夾捉伯玉解衣坐石上取冷水從頭澆之彭彭有  
氣俄而起伯玉曰熱不可忍乞冷飲嗣伯以水與之  
飲一斗遂差出史記

一婦人長病經年世謂之寒熱注病冬月中華佗令坐石  
槽中平旦用冷水汲灌云當滿百始七十灌冷戰欲死  
佗令滿數至八十灌熱氣乃蒸出驚覺然高二三尺至  
滿百灌佗乃使燃火溫床厚覆衣良久汗洽出著粉燥  
便愈史記

夏文莊公性豪侈稟賦異人纔睡則冷如僵一如逝者既  
覺須令人溫之良久方能動人有見其陛行兩車相能  
載一物颯然問之乃綿帳也以數千斤綿爲之常服袖

茅鍾乳硫黃不可勝紀晨朝每服鍾乳粥有小吏竊之  
疽發不可救筆談

吳箕池治一人年三十餘產後患虛症惡寒口不能言手  
足不能動飲食頗進大小溲如常多汗治用參芪大劑  
加桂枝每劑或一錢二錢三錢量病勢輕重出入服藥  
一年半時值暑月惡寒風愈甚御綿複衣口已能言手  
足能動但惡風寒不去乃令人強扶出風涼處坐用涼  
水強浸手足口含冷水初甚怯良久能耐覺安漸至煖  
至熱熱漸甚吃冷飲乃以凉水頓飲之複衣頓除如常  
而愈

按經曰惡寒戰慄皆屬於熱又曰禁慄如喪神守皆



屬於火原病式曰病熱甚而反覺自冷此為病熱實非寒也丹溪曰古人遇戰慄之證有以木承氣湯下燥糞而愈者惡寒戰慄明是熱症但虛實有別觀數說而惡寒治法可想矣

*[Faint bleed-through text from the reverse side of the page]*



李東垣治一人目赤煩渴引飲脉七八至按之則散此無根之脉用薑附加人參服之愈  
玉田隱者治一人得熱病雖新寒亦以水精浸水輪取握手中象以為熱曰此寒極似熱非熱也治以附子愈  
按以上治例皆陰陽幽顯之奧水火徵兆之微學者深求內經之旨則造化之理可得而明矣

熱氣病

齊中御府長信病淳于意入診其脉告曰熱氣病也然暑  
汗脉少衰不死曰此病得之當浴流水而寒其已而熱信  
曰唯然往冬時為王使於楚至莒縣陽周水而莒橋梁  
頰壞信則擊車轅未欲渡也馬驚即墮信身入水中幾  
死吏即來救信出之水中衣盡濡有問而身寒已熱如  
火至今不可以見寒意即為液湯火齊逐熱一飲汗盡  
再飲熱去三飲病已即使服藥出水二十日身無病者所以  
知信之病者切其脉時并陰脉法曰熱病陰陽交者死  
切之不交并陰并陰者脉順清而愈其熱雖未盡猶活  
也腎氣有時間濁在太陰脉口而希是水氣也腎固主

承故以此知之失治一時即轉為寒熱

沈宗常治孔侍郎當晨體如燔絕飲食醫益以為熱常獨  
謂熱寧可泄以暑藥佐之温以益脾愈

名醫類案卷之五終

名醫類案卷之五

四十一

